

gerechnet wirdt / ist solches im kauff / vnd verkauff / gar ein nutz  
Sachen.

Auff solchen weg / ist auch ein jedes Wein Maß zurechnen /  
wann es auff zwey mal / als wie 2. Postungen gerechnet / vnd  
hernach zusammen summiert wirdt / auß diesem obgesetzten /  
nun kanst du hie verstand ohne weitere erinnerung genugsam  
nemen.

## Den halt eines angeschüttten Träidts hauffen zumessen.

**W**enn es erst kühl daher wirdt / vnd noch zuschwäßen  
zeit haben / will ich dich noch eines auß obstehenden  
Fundament herfließend lehren / wann auff einem Ka-  
sten an einem hauffen / der durch vnd durch gleiche höhe hat / et-  
lich viel Meuchts Träidts angeschütt weren / wie solches bey Clö-  
stern / oder Schlößern / zubesehen pfleget / so Cubier wie vor  
bey der halben Kantel gelehret / deinen Mezen / in Zoll / vnd mer-  
cke solche Zoll / als dein Mensur, vorn im ersten Capitel ist der-  
gleichen Mensur allbereit zufinden / diß ortß aber weiln kein  
Cubierte Bierung bey dem Träidts / als wie bey dem Wassers  
Schaff / vnd der halben Kantel / sondern lauter raum vnd Träid  
verhanden / so muß der Mezen auch zu lauter raum gemacht  
werden / dem thue also : Dividier den gänzen Cubierten Mezen  
in 14. Theil / thue 3. Theil hinweg / die 11. Theil sein der völli-  
ge raum des Mezen / messe hernach den hauffen an den zweyten  
Haupt : oder kürzern Seiten mit einem Werckschuch / ver-  
gleich dieselbige zu einer gleichen Seiten / mache es auch zu Zoll-  
len / jeden Schuch mit 12. hernach messe auch / wie viel Zoll tieff  
der hauffen angeschütt / mit solcher tieffen multiplicier die ge-  
fundene breiten / was kommt / das multiplicier in die länge / so  
auch